

# Program Interaksi Akademik Calon SPM 2021, Dapat Sambutan daripada Ibu Bapa



Labuan– SMK Taman Perumahan Bedaun (SMKTPB) telah berjaya mengadakan “Program

Interaksi Akademik” bersama guru-guru Tingkatan 5, ibu bapa dan calon SPM 2021 pada 17 Ogos 2021 (Selasa). Program yang dilaksanakan secara dalam talian melalui medium “google meet” telah dihadiri oleh 90 calon SPM 2021 bersama- sama dengan ibu bapa masing-masing. Turut hadir bersama dalam program ini ialah Tuan Pengetua, En. Ag. Rozlan bin Manan, Pen. Kanan Pentadbiran, Pn. Chai Yee San, Pen. Kanan HEM, En. Awang Adi bin Tuah, Pen. Kanan Kokurikulum, Pn. Lau Chin Ying serta Guru-guru Kanan Bidang. Objektif program ini dilaksanakan adalah untuk mewujudkan interaksi dua hala antara pihak sekolah dan ibu bapa dalam membincangkan isu dan pencapaian anak-anak calon SPM 2021 agar peningkatan pencapaian dapat dihasilkan dari masa ke masa.

Majlis dimulakan dengan pembentangan analisis pencapaian murid-murid Tingkatan 5 dalam Peperiksaan Pertengahan Tahun (PPT) 2021 baru-baru ini oleh Tuan Pengetua, En. Ag

Rozlan bin Manan. Sebelum memulakan pembentangan, beliau merakamkan ucapan terima kasih kepada ibu bapa yang sudi hadir demi memastikan kecemerlangan anak-anak dalam SPM 2021. Dapatan daripada analisis PPT 2021, Tuan Pengetua memaklumkan bahawa Gred Purata Sekolah (GPS) yang dicapai ialah 5.59, manakala peratus lulus ialah 79.76 peratus. Selain itu, seramai 7 orang murid didapati gagal dalam kedua-dua mata pelajaran wajib lulus iaitu Bahasa Melayu dan Sejarah dalam peperiksaan ini. Pihak sekolah amat berharap agar semua murid lulus dalam semua mata pelajaran dan mencapai sekurang-kurangnya Gred "C" dalam peperiksaan akan datang. Berdasarkan kepada analisis pencapaian PPT juga, masih banyak lagi intervensi yang harus dilaksanakan bagi mencapai sasaran sekolah dalam SPM 2021 iaitu dengan mencapai GPS 4.37 dan 100 peratus lulus, iaitu semua calon SPM layak mendapat sijil. Tuan Pengetua juga turut memaklumkan bahawa daripada analisis keputusan PPT 2021, seramai 12 orang murid telah dikenal pasti sebagai murid target cemerlang. Namun begitu, adalah menjadi harapan semua guru dan pihak sekolah agar semua murid akan lebih cemerlang dalam peperiksaan SPM kelak.

Dalam ucapannya selepas pembentangan pencapaian setiap mata pelajaran, Tuan Pengetua, En. Ag Rozlan memaklumkan kepada ibu bapa berkaitan analisis kehadiran murid-murid sepanjang PdPR berlangsung. Masih ada segelintir murid yang didapati kurang memberikan komitmen untuk hadir mengikuti PdPR. Oleh itu, kerjasama daripada ibu bapa amatlah diharapkan memandangkan sesi persekolahan secara bersemuka belum dapat dilaksanakan. Tanpa sokongan ibu bapa, anak-anak sudah pasti akan tercicir dalam pembelajaran yang kini hanya berlangsung di rumah. Beliau turut menjelaskan kepada ibu bapa bahawa pelaksanaan PdPR sememangnya tidak sama dengan pembelajaran secara bersemuka. Pembelajaran secara bersemuka membolehkan semua guru memberikan 100% tumpuan dan bimbingan kepada

semua murid terutamanya murid yang masih lemah dalam penguasaan mana-mana mata pelajaran.


En. Ag Rozlan turut menjelaskan bahawa sepanjang pencapaian SPM 2018 sehingga SPM 2020, komitmen daripada ibu bapa amat membanggakan kerana sentiasa bekerjasama dengan pihak sekolah untuk memastikan anak-anak mencapai kecemerlangan dalam SPM. Hal ini terbukti apabila keputusan SPM sejak tiga tahun kebelakangan ini semakin meningkat iaitu SPM 2018 (GPS 5.34), SPM 2019 (GPS 5.14) dan SPM 2020 (GPS 4.76). Oleh hal yang demikian, beliau amat yakin dengan komitmen yang ditunjukkan oleh guru-guru di samping yakin dengan kemampuan murid untuk memastikan sasaran sekolah pada tahun ini dapat dicapai.

PERKARA	TOV PAT 2020	PPT 2020	PPT 2021	PERCUBAAN SPM 2021	ETR
GPS	5.94	6.00	5.59		4.37
% LULUS	47.14	79.79	79.76		100

En. Ag Rozlan membentangkan analisis pencapaian PPT 2021. Pada akhir ucapannya, beliau turut memaklumkan beberapa intervensi telah dirancang oleh pihak sekolah bagi menangani isu murid cicir dalam PdPR. Beliau amat mengharapkan kerjasama daripada ibu bapa yang merupakan kekuatan dalam kejayaan pelaksanaan PdPR kerana anak-anak sepenuhnya berada di rumah. Beliau juga yakin dan percaya bahawa semua guru akan menggunakan pelbagai kaedah yang terbaik untuk memberikan bimbingan walaupun melalui PdPR. Untuk makluman bersama, Program Interkasi Akademik bagi murid-murid Tingkatan 1, 2, 3 dan 4 juga berlangsung pada

pada masa dan tarikh yang sama melalui medium luar talian (telegram, whatsapp atau telefon). Majlis berakhir dengan penyerahan slip keputusan Peperiksaan Pertengahan Tahun 2021 dalam bentuk PDF kepada ibu bapa secara peribadi.

**Berita Oleh : SMK Taman Perumahan Bedaun**



Sebahagian daripada ibu bapa dan murid-murid yang turut hadir